

Morning Regional Dogri News Bulletin, 10th June 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. नरेन्द्र मोदी होरें लगातार त्रीये कार्यकाल लेई भारत दे प्रधानमंत्री दे औहदे ते राजदारी दी सगंध लैती। उंदे कन्नै नमें मंत्री परिषद नै बी सगंध लैती।
2. डॉ. जितेन्द्र सिंह होर उपरोतली त्रीह बारी केन्द्री मंत्री बनने आले जम्मू कश्मीर दे पैहले लीडर बने।
3. प्रधानमंत्री नरेन्द्र मोदी होरें आखेआ जे भारत उंदे त्रीये कार्जकाल दरान क्षेत्र दी अमन रमानदारी तरक्की ते खुशहाली लेई कम्म करना जारी रखोग।
4. रियासी जिले च संदिग्ध आतंकी हमले परैंत तीर्थ यात्रिएं कन्नै भरोची दी बस डूहगी खाई च डिग्गने करियै 10 जनें दी मौत ते 33 जख्मी।
5. प्रशासनिक काउंसल नै जम्मू ते श्रीनगर दौनें संभागें दे सरकारी मैडिकल कालेजें ते सुपर स्पैशिलिटी अस्पतालें लेई 3 स्तरे आले अमला संरचना दी अमलावरी गी मंजूरी दे अलावा जम्मू कश्मीर पुलस च भर्ती ताई बॉट जनजाति गी जिस्मानी मानकें च छूट देने गी मंजूरी दिक्ती ऐ।

<><><><><><>

Swearing Ceremony

नरेन्द्र मोदी होरें लगातार त्रीह बारी भारत दे प्रधानमंत्री दे तौर पर सगंध लैती ऐ। राष्ट्रपति द्रौपदी मुर्मू होरें राष्ट्रपति भवन च आयोजित समारोह च नमें मंत्री परिषद दे सदस्यें कन्नै मोदी होरें गी औहदे ते राजदारी दी सगंध दोआई। शपथ ग्रेहण समारोह दरान 30 कैबिनेट, 5 राज्य मंत्रिएं(स्वतंत्र प्रभार) ते 36 राज्य मंत्रिएं सगंध लैती। बीजेपी दे वरिष्ठ नेता राजनाथ सिंह, अमित शाह, नीतिन गड़करी, डॉ. एस.जयशंकर, पियूष गोयल, धर्मेन्द्र प्रधान, निर्मला सीतारमण, ते बीजेपी दे अध्यक्ष जे.पी.नड्डा होरें कैबिनेट मंत्री दे तौरा पर सगंध लैती। पार्टी दे वरिष्ठ नेता राव इंद्रजीत सिंह, डॉ. जितेन्द्र सिंह ते अर्जुन राम मेहावाल हुंदे कन्नै—कन्नै शिवसेना दे प्रताप राव जाधव होरें राष्ट्रीय लोकदल प्रमुख जयंत चौधरी होरें राज्य मंत्री (स्वतंत्र प्रभार) दे तौर पर सगंध लैती। शपथ ग्रेहण समारोह दरान कुल 36 राज्य मंत्रिएं बी सगंध लैती।

<><><><><><>

Dr. Jatiner Singh

उधमपुर-कठुआ लोकसभा हल्के थमां सांसद डॉ. जितेन्द्र सिंह होरें कल लगातार त्रीह बारी केन्द्र च नरेन्द्र मोदी हुंदी अगुवाई आली सरकार च केन्द्रीय राज्य मंत्री दे तौर पर सगंध लैती। डॉ. सिंह होरें लगातार त्रीह बारी केन्द्र च मंत्री बनने आले जम्मू कश्मीर थमां पैहले सियासतदान न। एहदे थमां पैहले डॉ. कर्ण सिंह होरें बी 1967 थमां 1977 तगर केन्द्री मंत्री रेई चुके दे न, ओह त्रीह बारी चौधरी चरण सिंह हुंदी सरकार च मंत्री बने हे, पर त्रीह बारी मंत्री ओह किश कम्मं परैंत बने।

<><><><><><>

Cabinet Meet

नमीं केन्द्रीय कैबिनेट दी पैहली बैठक अज्ज होने दी मेद ऐ। एह बैठक संजा तगर लगने दी संभावना ऐ। कल प्रधानमंत्री नरेन्द्र मोदी ते उंदे नमें मंत्री परिषद नै औहदे दे सगंध लैती। राष्ट्रपति द्रौपदी मुर्मू होरें राष्ट्रपति भवन च आयोजित इक समारोह च मोदी हुंदे कन्नै मंत्री परिषद दे सदस्यें गी औहदे ते राजदारी दी सगंध दोआई।

<><><><><><>

PM World Leaders

प्रधानमंत्री नरेन्द्र मोदी होरें आखेआ जे भारत उंदे त्रीए कार्यकाल च खित्ते दी शांति, प्रगति ते समृद्धि लेई कम्म करना जारी रखोग। उंदे खित्ते च लोकें बश्कार आपसी सरबंध ते संपर्क बधाने दा आह्वान कीता। उनें कल रातीं राष्ट्रपति भवन च शपथ ग्रहण समारोह मगरा भारत दे गोआंढी मुख्खें ते हिंद महायागर क्षेत्र दे नेताएं कन्नै मलाटी दरान एह गल्ल आक्खी। प्रधानमंत्री होरें इनें नेताएं दा धन्नबाद करदे होई गोआंढी पैहले आली नीति ते सागर दृष्टिकोण प्रति भारत दी वचनबद्धता दोहराई। मोदी होरें आखेआ जे भारत अंतर्राष्ट्रीय क्षेत्रें च ग्लोबल साउथ गी अवाज बुलंद करना जारी रखोग।

<><><><><><>

Reasi Attack

रियासी जिले दे त्रेआट ग्रां कश आतंकी हमले च श्रद्धालुएं गी लेई जा'रदी इक बस डूहंगी खाई च जाई पेई। हस हादसे च 10 लोकें दी मौत होई गई ते 33 होर घायल होई गे। बस शिवखोड़ी थमां कटरा जा'रदी ही।

एसएसपी रियासी मोहित शर्मा होरें दस्सेआ जे बस दे डरैवर गी गोली लग्गी जेह्दे मगरा ओह्दा गड्डी पर काबू नेई रेआ। घायलें गी नेडे दे रियासी आले ते जम्मू दे अस्पताले च इलाज लेई लेता गेआ। राष्ट्रपति द्रौपदी मुर्मू होरें घटना पर दुख जताया। उनें श्रद्धालुएं गी लेइयै जा'रदी बस पर होए दे आतंकी हमले गी मनुक्खता प्रति अपराध दस्सेआ ते आखेआ जे एह्दी सख्त लफ्जें च निंदेआ होनी लोड्चदी। राष्ट्रपति होरें घायलें दे तौले नरोए होने दी कामना बी कीती ते आखेआ मुख्य पीड़ित परोआरें कन्नै मजबूती कन्नै खड़ोते दा ऐ। प्रधानमंत्री नरेन्द्र मोदी होरें बी हालात दी जानकारी लैती ते उपराज्यपाल मनोज सिन्हा होरें गी हालात पर लगातार तक्क रखने लेई आखेआ। उनें घायलें गी लोड्चदी मैडिकल सहायता उपलब्ध करोआने लेई बी आखेआ। केन्द्रीय मंत्री अमित शाह होरें बी इस हमले दी निंदेआ कीती ऐ। उनें उपराज्यपाल ते पुलस महानिदेशक हुंदे कन्नै गल्ल कीती ते घटना दी जानकारी लैती। शाह होरें आखेआ जे इस हमले च शामिल लोकें गी बख्शेआ नेई जाग। केन्द्री मंत्री राजनाथ सिंह होरें इस हमले दी सख्त लफ्जें च निंदेआ कीती ते घायलें दे तौले नरोए होने दी कामना कीती।

<><><><><><>

Life Skill NCC

नोजवानें गी बाइखितयार बनाने दे मकसद कन्नै लाइफ स्किल पर सिखलाई देने आली सुरभि कोहली बाबा होरें 2 एनसीसी कंपनी भद्रवाह पास्सेआ एनसीसी ट्रेनिंग अकैडमी नगरोटा च आयोजित इक कैंप दरान 500 कैडटें ताई इक शानदार सत्र लाइयै उनेंगी उज्जवल भविक्ख लेई प्रेरित कीता। एनसीसी निदेशालय ते एनसीसी ग्रुप जम्मू पास्सेआ आयोजित टकोह्दे कार्जक्रम दा मकसद नोजवान कैडटें गी उनेंगी व्यक्तिगत ते व्यावसायिक विकास लेई लोड्चदे जीवन कौशल कन्नै करना हा।

<><><><><><>

Holiday

सरकारै गुरु अर्जुन देव जी हुंदे शहीदी दिवस ते गुरु हर गोविंद जी हुंदे प्रकाश उत्सव सरबंधी छुट्टी गी पैहले करी दित्ता ऐ। इक आदेश मूजब गुरु अर्जुन देव जी हुंदी शहीदी दिवस सरबंधी छुट्टी 16 जून दे बजाए अज्ज यानि 10 जून गी होग। एह्दे कन्नो कन्नी प्रकाश उत्सव सरबंधी छुट्टी 5 जुलाई दे बजाए हुन 22 जून गी होग।

<><><><><><>

AC Medical

जम्मू कश्मीर दे उपराज्यपाल मनोज सिन्हा हुंदी प्रधानता च कल लग्गी दी प्रशासनिक परिषद दी बैठक च जम्मू कश्मीर दे नमें सरकारी मैडिकल कालेज दी तर्ज पर राश्ट्रीय मैडिकल कमीशन दे मानदंडे मताबक सरकारी मैडिकल कालेज, सुपर स्पैशिलिटी अस्पताल ते सुपर स्पैशिलिटी अस्पताल श्रीनगर च 3 स्तरे आले अमला संरचना दी अमलावरी गी मंजूरी दिक्ती गई। प्रशासनिक परिषद नै परोआर कल्याण निदेशालय एमसीएच ते टीकाकरण दे कर्मचारिं दी तनखा दी लोड़ गी पूरने लेई केन्द्री हिस्से लेई अगेत्री रकम प्रदान करने आस्तै वित्त मैहकमे दे प्रस्ताह गी मंजूरी दिक्ती गई। एह रकम माली ब'रे दे जून ते नवम्बर च दऊं किशतें च जारी कीती जाग।

<><><><><><>

AC-Tribal

प्रशासनिक परिषद नै जम्मू कश्मीर दे बौद्ध अल्पसंख्यक "बॉट जनजाति" दे सरबंधें च जम्मू कश्मीर पुलस च भर्ती लेई जिस्मानी मानकें च दऊं इंचे दी छूट देने गी बी मंजूरी दिक्ती। होर दुए वर्गे लेई 5 फुट-6 इंच ते महिला मेदवारें लेई 5 फुट-2 इंच तैह ऐ। एहदे शा पैहले हिमालय बौद्ध सांस्कृतिक सोसायटी पाडर जिला किशतवाड़ नै इस सिलसिले च उपराज्यपाल हुंदे कन्नै मलाटी लाइयै अपनी गल्ल अगगे रखी ही। बॉट जनजाति कन्नै सरबंधत तकरीबन 3 जहार शा बद्ध बौद्ध हांगु, लौसैन कब्बन ते तुन दे इलावा पाडर दे आले दुआले दे इलाके च रौहदे न, जिनेंगी इस फैसले थमां लाह पुज्जोग।

<><><><><><>

RDD

ग्रामीण विकास ते पंचैती राज मैहकमे दे दे सचिव डॉ. शाहिद इकबाल चौधरी होरें मैहकमे दे फील्ड अमले ते होरने मुत्तलका लोकें कन्नै बैठक लाई ते ढांचागत विकास दे अलावा बक्ख-बक्ख सरहदी जिलें च स्कीमें दी अमलावरी दा जायजा लैता। मैहकमे आस्सेआ बन्ने आले ग्राएं च ढांचागत विकास करने ते होरने सेवाएं तगर लोकें दी पुज्ज गी जकीनी बनाने लेई व्यापक योजना बनाई जा'रदी ऐ। डॉ. चौधरी होरें स्मार्ट क्लासरूमें, आदर्श आंगनवाड़ी केन्द्र, सैलानी सुविधा, पंचैत घर, साफ सफाई सरबंधी गतिविधिएं, मता झाड़ देने आले बूहटें लाना, ग्राएं च शिड़कें दा विकास, पीने आले पानी दी सुविधा, महिलाएं लेई खास गतिविधिएं ते होर नेकें कम्में पर जोर पाया।

<><><><><><>

Army BBBP

सरकारै आस्सेआ टकोहदे तौरा पर कुड़िएं लेई बनाई गेदियां कल्याणकारी योजना बारे लोकें गी जागरूक करने लेई सेना नै सरकारी हायर सकेंडरी स्कूल चकलसाल्टा रियासी च बेटी बचाओ बेटी पढ़ाओ पर इक कार्यक्रम दा सरिस्ता कीता। कार्यक्रम दा मकसद समाज च महिला दे महत्व गी समझने ते उनेंगी ना शड़ा कैरियर विकास दे मामलें च सगुआं व्यक्तित्व निर्माण च बी बरोबर मौके उपलब्ध करोआना हा। समाज दा विकास महिलाएं गी दित्ते गेदे मौके बरोबर हुंदा ऐ।

<><><><><><>

Army Rajouri

राजौरी दिवस समारोह दिएं तैआरिएं दे हिस्से च भारतीय सेना पास्सेआ राजौरी दे धनीधर किले च इक लाइट एंड साउंड शो दा सरिस्ता कीता गेआ। कार्यक्रम दा सिरलेख राजौरी दी गौरवशाली विरासत साढ़े युद्ध नायकें गी चेता करना ते आजादी दा अमृतमहोत्सव हा। इस लाइट एंड साउंड शो च बड़े गै असरदार ढंगै कन्नै राजौरी दे गौरवशाली अतीत ते सगुसां विरासत पर लोह पाई गई। कार्यक्रम च त्रै स्कूलें दे विद्यार्थिएं, मकामी नोजवानें ते होरने नेकें धनीधर किले कन्नै जुड़े दे शानदार इतिहास गी दिक्खेआ।

<><><><><><>

Army Yoga

नोजवान पीढ़ी ते होर दुए लोकें गी तंदरुस्त रौहने लेई योग दे महत्व बारे जागरूक करने लेई सेना नै बेहरामगला च इक योग कैंप दा सरिस्ता कीता। “योग: खुश ते सेहतमंद नागरिक” सिरलेख कन्नै लग्गे दे इक कैंप दा मकसद लोकें दी दमागी ते जिस्मानी ऊर्जा बधाने च मदाद करना हा तां जे लोक सौहगे होइयै जोश कन्नै अपनी जिंदगी बतान। मजूद लोकें गी जानकारी दित्ती गई जे योग दा अभ्यास करियै नकारात्मक भावनाएं गी घट्ट कीता जाई सकदा ऐ।

<><><><><><>

T-20 Cricket

न्यूयार्क च टी-20 क्रिकेट विश्व कप च कल खेड़डे गेदे इक रोमांचक मकाबले च भारत नै पाकिस्तान गी 6 रंजें कन्नै हराई दित्ता। पैहले बल्लेबाजी करदे होई भारत दी टीम 19 ओवरें च 119 रंज पर गै आउट होई गई। परते च 120 रंजें दे लक्ष्य दा पिच्छा करदे होई पाकिस्तान दी टीम 20 ओवरें च शड़े 113 रंज गै बनाई सकी। जसप्रीत बुमराह दी शानदार गेंदबाजी करियै प्लेयर ऑफ द मैच घोषत कीता गेआ।